

Comité-Schnitzelbank

1934



E Huffe Lytt stehn in der Staine -
Was isch ächtscht au im Ganthuus fail?
Mit froher Myne gsehsch e kaine -
Verstaigeret wärde Stamm-Aadail!
Das zaigt uns wieder sunneglar:
Nur ai Bangg isch no wunderbar
Und haltet ewig, gottsaidangg
Das isch - e Schnitzelbangg!

Dr Ping-Pong-Sport isch arg in Schwang ko
(„Tischtennis“ haisst me das uff Dytsch!)
Die eltere Lyt, die sinn nit lang ko -
Die Jingere frait dä Ping-Pong-Kitsch!
Bim Spiele mit däm Bälleli
Verwitscht mäng nuggisch Wälleli
E Ma - und dä verfluecht am Aend
Sy Ping-Pong-Tämperamänt!

Die neyi Zytt isch ehnder knotig!
Dr Staat hlft au sy Dail derzue:
Er schafft e Stell fir Eh-Birotig -
Dert hänn si alli Händ voll z'tue!
In friererer Zyt, me dänggt no dra,
Hänn d'Kinder Schnudernase gha;
Jetz isch es umkehrt: Jetz - pfitschinder -
Hänn d'Snudernase Kinder!

Wo d'Reet d'Dreiroosebrugg aaluege,
Dänggt mäenge, 's Kennt en Ungligg gä!
D'Bartejdisziplin goht uus de Fuege:
Si tien sich blaich bim Händli näh!
Wie härzig isch das „Ringerose“!
Wie rutscht ene do 's Härz in d'Hose
Und mängs derzue, was hesch, was
Wo kai Bartejfarb isch! [gisch,

Bald jede simbble Daigbildhauer
Und jede glaine Pfluttebegg
Wird hitte zuemene „Tea-Room-Bauer“ -
In Schare kemme d'Unterregg!
Im Tea-Room in bim „Fife o'clock“
Do pfluttet d'Frau im dyrschte Rogg,
Läbt nobel - und znacht ka dr Ma
E Schwartemaage ha!

Dr Kommunischt isch gege d'Styre
Und gege d' Zueschleeg got sy Stimm
Er ka-n-e Brachts-Allianz jetz fyre,
Denn d'Birgergwärbler hälfe-n-im!
Ob rooti Hammersichle-Zumpft,
Ob Birgergwärbler-Unvernumft -
Im Schnurewagnere, wie im Suff
Hert Frindschaft niemols uff!

Das Frailain „Freundlich“ dert im Globus,
Das haltet wie so mängi Frau
So „über de Dächer“, mängi Prob us
Zuem grosse Zorn vom A-C-V!
Und **under** de Dächer, dängg me-n-au,
Git's Zwätschgedäg im A-C-V!
„Im Härz vo Basel“ - „Zwätschgedäg“
Das isch kai „neye Wäg“!

's ney Stadtplakat dunggt aim zuem lache-
Mir finde 's Sujet heegscht verfläht:
Me sott emol e Helge mache,
Wo zaigt, was uns sit Johre quält,
Wo nur au faissi Beschtlä sinn,
Het doch e Schwob sy Schnurre drinn -
Drumm stimmt dr Baslerstab erscht ganz
Mit eme Hooggegryz am Schwanz!

Kemmet alli am nächschde Sunntig z'obe am siebeni
in Musigsaal zuem grosse Schlussobe vo de Comité-
Schnitzelbängg. 's isch immer sauglunge.
